

■ CONVIVENZA

Amur per ils animals

DA PIEDER CAMINADA*

Bambi n'è mai stà mes ami. Betg che jau avess insatge cunter il tschierv da Virginia en il film da Walt Disney che ha commovì generaziuns d'uffants, geniturs e tats e tattas. Na, mes Bambi n'aveva da far nagut cun il Bambi charin dal film. Bambi era en mia uffanza il chaun da noss vischin. E Bambi ma tementava sgarschavlamain. Malgrà ch'el era pitschen e bellin era Bambi ordvart aggressiv. Sche jau vegniva memia datiers ad el filava el vers mai, urlava furiosamain, sgrigniva nau-schamain ed empruvava da tschappar mai tut a giappond. Per quai has-segiava jau Bambi.

Era Kuno n'è mai stà mes ami. Kuno tutgava tar l'anteriura scola da puras da Glion che vegniva manada da mungias. E Kuno era perfin anc pli aggressiv che Bambi, latiers anc grond e ferm. Fin oz n'hai jau betg chapì pertge che las mungias pietusas n'han betg giavischà questa bestia al diavel – u almain rentà ella vi da la chadaina. Pertge sche la genna restava ina giada averta per sbagl n'era Kuno betg pli da tegnair. Ed jau curriava per mia vita, muriva milli morts.

Ma ussa sun jau d'iventà in expert da chauns. Na, jau n'hai betg cumprà in chaun. Tuttina sun jau in expert. Sche jau lasch girar mia egliada tras la fanestra da mes biro paradeschans els tuts sper mai vi: ils chauns da la citad da Cuira. Gronds, pitschens, gross, satigls, cun pail curt u lung, d'ina color u da pliras colors, ils ins cun cua lunga, ils



auters cun cua curta. Ed ils chauns da Cuira n'èn mai senza accompagnament. Fertant che Bambi e Kuno en mia uffanza eran per il solit sulets per via tiran ils chauns da Cuira suenter lur possessurs, en il vair senn dal pled.

Davart ils possessurs pudess jau scriver cudeschs. Per exempel davart il gigant musculus che fa ina spassegiada cun in chaun che n'è strusch pli grond ch'in ratun. Ubain davart la dunna graziusa, da la quala ins sa dumonda co ch'ella duai pudair tegnair enavos ses chaun-luf sche quel tira ina giada fermamain vi da la tschinta. E pir da dretg davart ils patrums che tegnan il medem mument plirs chauns vi da la tschinta e van a spassegiar cun els en rotschas sin il Rossboden (pertge na vegn quest territori atgnamain betg numnà Hunds-boden?)

Naturalmain èn els tuts equipads perfetgmain, ils possessurs da chauns da Cuira e lur chars. I dat per exempel quels patrums exemplarics che portan ina tschinta speziala cun satgets vids (u forsà era plains) per ils cacs da chaun fermads londervi. Ubain quels che

han tratg en a lur totòs in pullover ch'els han fatg sezs cun stgaina. Mia superfavorita è dentant quella dunna che ha d'acurt mess giun plaun sin il parcadi avant mes plaz da lavur ina sutgetta per ch'il chaunet possia siglir senza sforz en l'auto. Tge che quai ha da far cun amur per ils animals na chapesch jau betg dal tut-tafatg.

Amur per ils animals? Forsa na duess jau betg reflectar surlonder, pertge jau n'hai mai gè in chaun. Tuttina, era jau sun pers sch'in chaun ma guarda cun eglis da buna fai e lascha pender innocentamain (u sapientivamain?) il chau, plirond uschia ch'i rumpa ad ins il cor. En tals muments emblid perfin jau ch'i dat sin quest mund era Bambis e Kunos. E quels na davan-tan mai mes amis. Garantì betg. Grrrrrrrr!

* Pieder Caminada è mainaproject scolaziun e redactur tar la «Südostschweiz». El è creschi si a Glion en ambient per gronda part tudestg e viva oz en il vitg rumantsch da Castisch.

Vocabulari

tschierv da Virginia – Weisswedel-hirsch
 commover – rühren, bewegen
 charin – herzig
 chaun – Hund
 tementar – Angst einjagen
 bellin – putzig
 filar – rasen, flitzen
 urlar – bellen, heulen
 sgrignir – knurren
 giappond – japsen
 mungia – Klosterfrau
 pail – Fell, Tierhaar
 ratun – Ratte
 chaun-luf – Wolfshund
 en rotschas – im Rudel
 totò – Hund, Vierbeiner
 far cun stgaina – stricken, lismen
 da buna fai – treuherzig
 plirar – winseln

Unterstützt von
der Lia Rumantscha



Lia Rumantscha